



МОНГОЛ УЛСЫН ХӨДӨЛМӨР,  
НИЙГМИЙН ХАМГААЛЛЫН САЙДЫН  
ТУШААЛ

2017 оны 02 сарын 23 өдөр

Дугаар А/33

Улаанбаатар хот

Журам батлах тухай


Монгол Улсын Засгийн газрын тухай хуулийн 24 дүгээр зүйлийн 24.2 дахь хэсэг, Гэр бүлийн хүчирхийлэлтэй тэмцэх тухай хуулийн 33 дугаар зүйлийн 33.1.5, 33.1.7 дахь хэсэг, 45 дугаар зүйлийн 45.1 дэх заалтыг тус тус үндэслэн ТУШААХ нь:

1. “Гэр бүлийн хүчирхийлэлд өртсөн хүүхдэд үйлчилгээ үзүүлэх журам”-ыг хавсралтаар баталсугай.

2. Журмын хэрэгжилтийг хангаж ажиллахыг Гэр бүл, хүүхэд, залуучуудын хөгжлийн газар /О.Алтансүх/-т даалгасугай.

3. Энэ тушаалын хэрэгжилтэд хяналт тавьж ажиллахыг Хүн амын хөгжлийн газар /С.Тунгалагтамир/, Хяналт-шинжилгээ, үнэлгээ, дотоод аудитын газар /Ц.Мөнхзул/ нарт даалгасугай

САЙД



Н.НОМТОЙБАЯР

Хөдөлмөр, нийгмийн хамгааллын  
сайдын 2017 оны 2 дугаар сарын 28-  
ны өдрийн А/33 тоот тушаалын  
нэгдүгээр хавсралт

## ГЭР БҮЛИЙН ХҮЧИРХИЙЛЭЛД ӨРТСӨН ХҮҮХДЭД ҮЙЛЧИЛГЭЭ ҮЗҮҮЛЭХ ЖУРАМ

Нэг.Нийтлэг үндэслэл

1.1. Энэхүү журмын зорилго нь сум, хороо /баг/-ны хамтарсан баг, гэр бүл, хүүхдийн асуудал эрхэлсэн төрийн байгууллага, хүүхэд хамгааллын чиглэлээр магадлан итгэмжлэгдсэн хуулийн этгээд, иргэн гэр бүлийн хүчирхийлэлд өртсөн, өртөж болзошгүй нөхцөл байдалд байгаа хүүхдэд хүүхэд хамгааллын хариу үйлчилгээ үзүүлэх, хүүхэд асрах хувилбарт үйлчилгээнд холбон зуучлах харилцааг зохицуулахад оршино.

1.2. Хүүхэд хамгааллын хариу үйлчилгээ нь гэр бүлийн хүчирхийллийн улмаас эрсдэлт нөхцөлд байгаа хүүхдийг илрүүлэх, мэдээлэх, шалгах, аюулгүйн зэргийн болон нөхцөл үнэлгээ хийх, тусгай хамгаалалтаар хангах, гэр бүлд нь эргэн нэгтгэх, дэмжих, холбон зуучлах, нийгэмшүүлэх, гэр бүлд нь эргэн нэгтгэх үе шат бүхий цогц үйлчилгээ байна.

1.3. Хүүхэд хамгааллын анхан болон хоёрдогч шатны урьдчилан сэргийлэх, хамгаалах, холбон зуучлах үйлчилгээг Хамтарсан баг үзүүлнэ. Тусгай хамгаалалтаар хангах, дэмжих, холбон зуучлах үйлчилгээг асуудал эрхэлсэн төрийн байгууллага, магадлан итгэмжлэгдсэн байгууллага, иргэн үзүүлж, хүүхэд гэр бүлийн нөхцөл байдал сайжирсан эсэхэд үйлчилгээний үнэлгээ хийж, эргэх холбоотой ажиллана.

1.4. Энэ журмыг хэрэгжүүлэхэд нь Гэр бүлийн хүчирхийлэлтэй тэмцэх тухай хууль, Хүүхдийн эрхийн тухай хууль, Хүүхэд хамгааллын тухай хууль, Гэр бүлийн тухай хууль, тэдгээртэй нийцэж гарсан эрх зүйн акт, олон улсын гэрээ, бусад холбогдох хууль тогтоомжийг удирдлага болгоно.

1.5. Хүүхэд хамгааллын хариу үйлчилгээ үзүүлэгч хамтарсан баг, магадлан итгэмжлэгдсэн байгууллага, иргэн нь үйл ажиллагаандаа мөрдөх "Хүүхэд хамгааллын дүрэм"-ийг баталж дагаж мөрдөнө.

1.6. Гэр бүлийн хүчирхийлэлд өртсөн хүүхэд 7, түүнээс дээш настай бол хүүхэд хамгааллын хариу үйлчилгээг төлөвлөх, хэрэгжүүлэхдээ хүүхдийн саналыг харгалзана.

### **Хоёр. Хүүхэд хамгааллын хариу үйлчилгээ, түүний хэлбэрүүд**

2.1. Гэр бүлийн хүчирхийллийн улмаас эрсдэлт нөхцөлд байгаа, гэмт хэрэг, зөрчлийн хохирогч, гэрч болсон хүүхдэд үйлчилгээ үзүүлж байгаа хамтарсан баг, магадлан итгэмжлэгдсэн байгууллага, иргэн нь, хүүхдийг гэр бүл, нийгэмд хэвийн амьдрахад нь тусалж, дэмжих чиглэлээр дараах үйлчилгээ үзүүлнэ:

- 2.1.1. Мэдээлэл хүлээн авах, бүртгэх, шалгах;
- 2.1.2. Аюулгүйн зэргийн үнэлгээ хийх;
- 2.1.3. Нөхцөл байдлын үнэлгээ хийх;
- 2.1.4. Аюулгүй байдлыг хангах;
- 2.1.5. Хамтарсан багийн үйлчилгээ
- 2.1.6. Холбон зуучлах үйлчилгээ;
- 2.1.7. Үйлчилгээнд үнэлгээ хийх;
- 2.1.8. Гэр бүлд нь эргэн нэгтгэх эсэх талаар дүгнэлт гаргах;
- 2.1.9. Хувийн хэргийг хаах;

### **Гурав. Мэдээлэл хүлээн авах, бүртгэх, шалгах**

3.1. Хүүхдийг гэр бүлийн хүчирхийлэлд өртсөн болон өртөж болзошгүй тухай мэдээлэл, сэжиг таамаглал, санал, гомдол, хүсэлтийг хүүхдийн тусламжийн утасны ажилтан, сум хорооны нийгмийн ажилтан, хүүхдийн эрхийн ажилтан, хууль сахиулагч хүлээн авч, Хүүхэд хамгааллын зөрчлийн мэдээлэл хүлээн авах маягтын дагуу бүртгэж, харьяаллын дагуу хамтарсан багт шилжүүлнэ.

3.2. Хамтарсан багийн нарийн бичгийн дарга мэдээллийг хүлээн авч, Хүүхэд хамгааллын үйлчилгээнд хүүхэд хүлээн авах бүртгэлийн маягтад бүртгэнэ. Бүртгэл нь хүчирхийлэлд өртсөн хүүхдийн талаарх анхдагч мэдээлэл бөгөөд тухайн хүүхэд болон гэр бүлд үзүүлэх үйлчилгээтэй холбоотой шийдвэрүүдийг гаргах үндэслэл болно.

3.3. Хүүхдийн талаарх мэдээллийг мэдээлэл хүлээн авсан байгууллага, албан тушаалтан хүчирхийлэлд өртсөн эсэх үнэн бодит байдлыг шалгах бөгөөд мэдээлэгчээс дараах асуудлыг тодруулж, тэмдэглэнэ.

- 3.4.1. нэр, хаяг, утасны дугаар;
- 3.4.2. тухайн хүүхэд, гэр бүлийг өмнө мэддэг эсэх;
- 3.4.3. тухайн гэр бүл, хүүхэдтэй ямар харилцаатай болох;
- 3.4.4. биеэр ирж уулзах боломжтой эсэх;
- 3.4.5. мэдээлэгч согтууруулах ундаа, мансууруулах бодис хэрэглэсэн эсэх;
- 3.4.6. мэдээлэгчид тухайн гэр бүлийн зүгээс ирж болох дарамт, шахалт, айдас байгаа эсэх;

3.5. Гэр бүлийн хүчирхийллийн талаарх мэдээллийг хүлээн авч, бүртгэснээс эхлэн хувийн хэргийг хаах хүртэлх үйлчилгээний үйл явцын мэдээллийг гэр бүлийн хүчирхийллийн мэдээллийн нэгдсэн санд хамтарсан багийн нарийн бичгийн дарга оруулна.



## **Дөрөв. Аюулын зэргийн үнэлгээ хийх**

4.1. Цагдаагийн албан хаагч хүүхдийн амь нас, эрүүл мэнд, аюулгүй байдалд учирсан, эсхүл учирч байж болзошгүй эрсдэлийг “Хүчирхийлэлд өртсөн хүүхдийн аюулын зэргийн маягт, аргачлал”-ын” дагуу хийх ба үнэлгээ хийх аргачлал дахь онцгой нөхцөл байдлууд нь эрсдэлийн түвшний өсөлтөд шууд хамаарна.

4.2 Хүүхдэд хийсэн аюулын зэргийн үнэлгээгээр “дунд”, “өндөр” эрсдэлтэй нь тогтоогдсон тохиолдолд эцэг эх, асран хамгаалагч, харгалзан дэмжигчийн саналыг харгалзахгүйгээр харъяа гэр бүл, хүүхэд, залуучуудын хөгжлийн байгууллагад мэдэгдэж, хамтран ажиллах арга хэмжээ авах ба хүүхдийг Гэр бүлийн хүчирхийлэлтэй тэмцэх тухай хуульд заасан түр хамгаалалтаар хангаж, хамтарсан багт мэдэгдэнэ.

## **Тав. Нөхцөл байдлын үнэлгээ хийх**

5.1. Нийгмийн ажилтан хүчирхийлэл үйлдэгдсэн газар дээр очиж, хүүхэд болон гэр бүлд Нөхцөл байдлын үнэлгээний журмын дагуу үнэлгээ хийнэ. Хүүхэд болон гэр бүлийн нөхцөл байдлын үнэлгээ нь хүүхэд, түүний гэр бүлд цаашид үзүүлэх үйлчилгээг тодорхойлох үндэслэл болно.

5.2. Хүүхэд, гэр бүлд нөхцөл байдлын үнэлгээ хийсэн нийгмийн ажилтан хүүхдийн нөхцөл байдлын үнэлгээг хүүхдийн хувийн хэрэгт хавсаргана.

5.3. Нөхцөл байдлын үнэлгээний явцад үүссэн нөхцөл байдлаас шалтгаалж, дараах арга хэмжээ авна:

5.3.1. хүүхдийн аюулын зэргийн тусгай хамгаалалтаар хангах арга хэмжээ авна.

5.3.2. энэ журмын 4.6.1-т заасан арга хэмжээ авах шийдвэрийг хамтарсан багийн ахлагч гаргана.

5.3.3.Хамтарсан баг нь хүүхэд болон гэр бүлийн нөхцөл байдлын үнэлгээ, аюулын зэргийн үнэлгээ хийсний үндсэн дээр хүүхэд хамгааллын үйлчилгээ шаардлагатай гэж үзсэн тохиолдолд хүүхдэд хувийн хэрэг нээж,үйлчилгээний төлөвлөгөө боловсруулж, шуурхай хамгаалах арга хэмжээ авах, нөхөн сэргээх, урьдчилан сэргийлэх үйлчилгээнд холбон зуучилна.

5.4. Аймаг, нийслэл, дүүргийн гэр бүл, хүүхэд, залуучуудын асуудал хариуцсан төрийн захиргааны байгууллага нь хүүхэд, гэр бүлийн нөхцөл байдлын үнэлгээ хийхэд хамтарсан баг, нийгмийн ажилтанд мэргэжил, арга зүйн дэмжлэг үзүүлнэ.

4.7. Энэ журмын 4.6-д дурдсан арга хэмжээ авах талаар гаргасан шийдвэрийг хамтарсан багийн хурлын шийдвэрт тусган, баталгаажуулж, баримт нотолгоог хувийн хэрэгт хавсаргана.

## **Зургаа. Аюулгүй байдлыг хангах**

6.1. Хүүхдийн аюулын зэргийн үнэлгээ, эрсдлийн үнэлгээ, нөхцөл байдлын үнэлгээний дүгнэлтийг хамтарсан багийн гишүүд хэлэлцэн, тухайн хүүхэд, гэр бүлийн гишүүдэд шаардлагатай хамгааллын үйлчилгээг хэрхэн үзүүлэх тухай хамтын шийдвэр гаргана.

6.2. Хамтын шийдвэр нь үнэлгээг хэлэлцсэн хамтарсан багийн хурлын тэмдэглэл байх бөгөөд хамтарсан багийн гишүүд гарын үсгээ зурж шийдвэрийг баталгаажуулна. Уг шийдвэрт хэлэлцсэн эрсдлийн болон нөхцөл байдлын үнэлгээ, аюулын зэргийн үнэлгээний дүгнэлтийг хавсаргана.

6.3. Сум, хорооны болон сургуулийн нийгмийн ажилтан, шуурхай үйлчилгээний төвийн нийгмийн ажилтан хүүхдийн аюулгүй байдлыг хангах, дахин гэр бүлийн хүчирхийлэл дарамтад өртөхөөс сэргийлж, хүүхдийн аюулгүй байдлын төлөвлөгөөг хүүхэд, мөн хүчирхийлэл, дарамт үйлдээгүй болох нь тогтоогдсон эцэг, эх, асран хамгаалагч, харгалзан дэмжигчийг оролцуулан хамтран боловсруулж, хэрэгжүүлэх заавар өгнө

6.4. Үнэлгээний санал, дүгнэлтэд тэмдэглэл, гэрэл зураг, дуу, дүрс бичлэг бусад нотлох баримтыг хавсарган он, сар, өдөр, гарын үсэг зурж, баталгаажуулсан байна.

6.5. Хүүхдийн болон гэр бүлийн нөхцөл байдлын үнэлгээ, аюулын зэргийн үнэлгээгээр дараах нөхцөл байдал үүссэн тохиолдолд хүүхдийг гэр бүлээс нь түр тусгаарлах, арга хэмжээг 24 цагийн дотор авна. Үүнд:

6.5.1. хүчирхийлэгч нь хүүхдэд ноцтой хохирол учруулах хутга, буу галт зэвсэг хэрэглэсэн;

6.5.2. хүүхдийг өлсгөх, ямар нэг газар ганцааранг нь тусгаарласан, нуусан, хорьсон;

6.5.3. хүүхэд өөрийгөө болон бусдыг гэмтээх, бэртээхийг завдсан;

6.5.4. эцэг, эх, асран хамгаалагч нь хүүхдээ асран хамгаалах чадваргүй,

хүүхдэд ноцтой хохирол учруулж болзошгүй;

6.5.5. гэр бүлд хүүхдийн аюулгүй байдлыг хамгаалах боломжгүй, асран хамгаалагч нь хүүхдээ аваад буюу орхиод зугтаах, барьцаалах үйлдэл, эс үйлдэл үзүүлсэн;

6.5.6. хүүхэд бэлгийн хүчирхийлэлд өртсөн бөгөөд хүчирхийлэл үйлдэгчтэй нэг дор амьдарч байгаа бол;

6.5.7. хүүхэд бие махбодийн гэмтэл бэртэл авсан;

6.5.8. хүүхэд айдас, сэтгэл санааны дарамтанд орсон, дахин орж болзошгүй байгаа;

6.5.9. хүчирхийлэл үйлдэгч нь хүүхдийн эмзэг байдлыг ашиглан, өөрт ашигтайгаар шийдвэр гаргуулах, ашиг олоход ашигласан, ашиглаж болзошгүй нөхцөл байдал үүссэн;

6.5.10. хүчирхийлэл үйлдэгч согтууруулах ундаа байнга хэрэглэдэг бол;

6.5.11. мансууруулах эм, сэтгэцэд нөлөөт бодис хэрэглэдэг бол;

6.5.12. хүчирхийлэл үйлдэгч хүүхдийн амь насанд заналхийлдэг бол;

### **Долоо. Хамтарсан багийн үйлчилгээ**

7.1 Хамтарсан баг нь хүүхдэд Гэр бүлийн хүчирхийлэлтэй тэмцэх тухай хуулийн 37, 38.1.1, 40,41,42-р зүйлд заасан үйлчилгээг Хамтарсан багийн журмын дагуу үзүүлнэ.

### **Найм. Дэмжих, холбон зуучлах үйлчилгээ**

8.1. Хамтарсан багийн нийгмийн ажилтны хийсэн нөхцөл байдлын үнэлгээгээр хүүхдэд тусламж, үйлчилгээ үзүүлэх зайлшгүй шаардлагатай талаар дүгнэлт гарсан бол иргэний бүртгэл, сэтгэл зүй, хууль зүй, боловсрол, эрүүл мэнд, нийгмийн халамжийн болон бусад шаардагдах үйлчилгээнд нийгмийн ажилтан холбон зуучилна.

8.2. Хамтарсан баг нь хүүхэд болон гэр бүлийн нөхцөл байдлын үнэлгээ, аюулын зэргийн үнэлгээнд үндэслэн дараах холбон зуучлах үйлчилгээ үзүүлнэ. Үүнд:

8.2.1. Хэрвээ хүүхдэд энэхүү журмын 6.5.1- 6.5.12-т шалтгаан нөхцөл үүссэн болон аюулын зэргийн түвшин дунд, өндөр эрсдэлтэй бол мөн журмын 12.2.1- 12.2.6-д заасан хүүхэд асрах хувилбарт үйлчилгээнд холбон зуучлана.

8.2.2. эмнэлгийн яаралтай тусламжаас бусад үйлчилгээг хохирогч хүүхдийн байнга, эсхүл түр оршин сууж байгаа газрын нутаг дэвсгэрийн эрүүл мэндийн байгууллага, хэрэв хохирогч хүүхэд эрүүл мэндийн байгууллага, хамгаалах байранд байгаа бол уг байгууллагын оршин байгаа газрын нутаг дэвсгэрийн эрүүл мэндийн байгууллагад холбон зуучилна.

8.2.3. сэтгэл зүй, сэтгэл заслын үйлчилгээ үзүүлэх эрх бүхий иргэн, магадлан итгэмжлэгдсэн байгууллагад холбон зуучилна.

8.2.4. хүүхдийн амь нас, эрүүл мэндэд аюул учирсан, уг үйлдэл нь гэмт хэргийн шинжтэй, хуулийн дагуу хэргийг шийдвэрлүүлэх шаардлагатай нөхцөлд хууль зүйн зөвлөгөө, өмгөөллийн үйлчилгээнд "Гэр бүлийн хүчирхийлэлд өртсөн хүүхдэд эрх зүйн туслалцаа үзүүлэх журам"-ын дагуу холбон зуучилна.

8.2.5. хүүхэд, түүний гэр бүлд үзүүлэх олон нийтийн оролцоонд түшиглэсэн нийгмийн халамжийн үйлчилгээг төлөвлөж, холбогдох халамжийн үйлчилгээний байгууллагад хүргүүлнэ.

8.3. Хүүхэд, гэр бүлд үйлчилгээ үзүүлсэн байгууллага, ажилтан үйлчилгээний явц, үр дүнгийн талаар холбон зуучилсан хамтарсан баг, бусад байгууллагад эргэн мэдээлнэ.

8.4. Холбон зуучлах үйлчилгээ үзүүлж байгаа хамтарсан багийн гишүүн, байгууллага хүүхэд, гэр бүлийн аюулгүй байдал, нууцлалыг хангана.

8.5. Дэмжих, холбон зуучлах үйлчилгээний хэрэгжилтэд Хамтарсан багийн ахлагч, хүүхдийн эрхийн ажилтан, орон нутгийн гэр бүл, хүүхэд, залуучуудын хөгжлийн асуудал хариуцсан байгууллага хяналт тавина.

8.6. Хуулиар үүрэг хүлээсэн төрийн байгууллага, албан хаагч, магадлан итгэмжлэгдсэн иргэн, хуулийн этгээд үйлчлүүлэгчид дэмжих, холбон зуучлах үйлчилгээг үзүүлээгүй, эсхүл шаардагдах үйлчилгээг үзүүлэхээс үндэслэлгүйгээр татгалзсан бол энэ тухай хүүхдийн эрхийн ажилтан тэмдэглэл үйлдэж, Төрийн албаны салбар зөвлөл, төрийн байгууллагын ёс зүйн хороо, Нийгмийн ажилтны мэргэжлийн ёс зүйн үндэсний болон салбар хороо, холбогдох бусад мэргэжлийн ёс зүйн хороонд хүргүүлж шийдвэрлүүлнэ.

### **ЕС. Үйлчилгээний үр дүнгийн явцын үнэлгээ хийх**

9.1. Үйлчилгээний үр дүнгийн явцын үнэлгээ нь хүүхдэд хувийн хэрэг нээснээс хойших, үйлчилгээний бүрэлдэхүүн хэсэг бүрт дэвшүүлсэн зорилго, зорилтод хүрсэн эсэх, үйлчилгээг мэргэжлийн түвшинд үзүүлсэн эсэхэд сар бүр хамтарсан багийн дотоод хяналт, хүүхэд, түүний гэр бүлд гарч буй өөрчлөлт, үйлчилгээний чанар, үр дүнгийн талаарх цогц үйл явц байна.

9.2. Гэр бүлд гарч байгаа эерэг өөрчлөлт, дэвшлийг үнэлэхдээ хамтарсан багийн нарийн нийгмийн ажилтан нь дараах асуудлыг нягтлана.

9.1.1. хүүхдийн аюулгүй байдал хангагдаж байгаа эсэхийг баталгаажуулах;

9.1.2. Эрсдэлт нөхцөл байдал буурсан, арилсан эсэх;

9.1.3. хүүхэд болон гэр бүлд хүчирхийллийн үзүүлэх сөрөг үрдагавруудыг амжилттай шийдвэрлэж чадаж байгаа эсэх;

9.1.4. хүүхэд, гэр бүлд үзүүлэх хүүхэд хамгааллын үйлчилгээний төлөвлөгөөнд тусгасан зорилт, үр дүнд хүрч чадаж байгаа эсэх;

9.1.5. гэр бүлийн хүрээнд хүрсэн амжилт, үр дүн;



9.3. Гэр бүлийн эерэг өөрчлөлтийн үнэлгээг хамтарсан багийн хурлаар хэлэлцүүлж, хүүхэд хамгааллын үйлчилгээний төлөвлөлтийг шинэчилж, хүүхдийг гэр бүлд нь эргэн нэгтгэх, эсхүл хүүхэд асрах хувилбарт үйлчилгээ үзүүлэх эсэхийг шийдвэрлэнэ.

#### **АРАВ. Гэр бүлд нь эргэн нэгтгэх эсэх шийдвэр гаргах**

10.1. Тусгай хамгаалалтанд байгаа хүүхдийг дараах нөхцөлийг хангасан тохиолдолд гэр бүлд нь эргэн нэгтгэж болно.

10.1.1. энэ журмын 6.2.1-т дурдсан үйлчилгээнд хамрагдаж байгаа хүүхдээ эцэг эх, асран хамгаалагч гэртээ ирүүлэх хүсэлтийг албан ёсоор бичгээр гарган, нийгмийн ажилтантай хамтран ажиллах хүсэлтэй байгаа;

10.1.2. Үйлчилгээний явцын үнэлгээгээр хүүхдийг гэр бүлээсээ тусдаа амьдрахад хүргэсэн шалтгаан арилсан гэж хамтарсан багийнхан дүгнэсэн бол;

10.1.3. эцэг эх нь зан үйлийн албадан сургалтанд хамрагдсан тухай нотлох баримтыг үндэслэн;

10.1.4. хүчирхийлэл үйлдэгч этгээд, тухайн гэр бүлд амьдрахаа больсон;

10.1.5. хүчирхийлэл үйлдэгч этгээд хуулийн дагуу тодорхой хугацаагаар зорчих эрхээ хязгаарлуулсан, баривчлагдсан, хоригдсон;

10.2. Хүүхдийг гэр бүлд нь эргэн нэгтгэсэн тохиолдолд Хамтарсан баг тухайн гэр бүлд улирал тутам нөхцөл байдлын үнэлгээ хийж, хоёр жил хүртэл хугацаанд хяналт тавьж, дэмжих үйлчилгээнд хамруулна.

10.3. Хүүхдийг дараах нөхцөлд гэр бүлд нь эргэн нэгтгэх боломжгүй гэж үзнэ:

10.3.1. шүүхээс эцэг эх байх эрхийг нь хязгаарласан, хассан бол;

10.3.2. эцэг эх, асран хамгаалагч, харгалзан дэмжигч нь хүүхдийг гэртээ буцаан авах боломжгүй нь нөхцөл байдлын үнэлгээгээр тогтоогдсон бол;

10.3.3. эцэг эх, асран хамгаалагч, харгалзан дэмжигч нь гэр оронгүй, тэнэмэл амьдралтай бол;

10.3.4. эцэг эх, асран хамгаалагч, харгалзан дэмжигч нь согтууруулах ундаа, мансууруулах бодисын хамааралтай, хүүхдээ хайхардаггүй, гуйлга гуйлгадаг, тэвчишгүй хүнд хөдөлмөр эрхлүүлдэг бол;

10.3.5. гэр бүлийг эргэн нэгтгэх нь боломжгүй гэж үзэхэд хүргэсэн эцэг эх, асран хамгаалагч, хүүхэд, гэр бүлийн бусад гишүүдийн хооронд хүчирхийллийн харилцаатай, зан үйлд эерэг өөрчлөлт гараагүй бол.



10.3.6. гэр бүлийнхэн нь болзошгүй хүчирхийллээс хүүхэд болон түүний дүүсийг хамгаалах чадваргүй бол;

10.3.7. Хамтарсан баг тухайн гэр бүлтэй тодорхой хугацаанд ажилласан боловч эерэг өөрчлөлт, хүчин чармайлт гарахгүй байгаа бол;

10.4. Хүүхдийг гэр бүлд нь эргэн нэгтгэх, эсэх шийдвэрийг хамтарсан багийн хуралдаанаар хэлэлцэж, хамтын шийдвэр гаргах ба Хамтарсан багийн ахлагч гарын үсэг зурж баталгаажуулна.

#### **Арван нэг. Үйлчилгээг төгсгөж, хувийн хэргийг хаах**

11.1. Хамтарсан багийн үйлчилгээний үр дүнд хүүхэд болон гэр бүлийн байдал хэвийн болсон гэж үзэж, цаашид хүчирхийлэлд өртөх эрсдэл арилсан, эсхүл хүүхэд 18 насанд хүрсэн тохиолдолд хувийн хэргийг хаана.

11.2. Хамтарсан багийн нарийн бичгийн дарга тухайн гэр бүлийн аюулын зэрэг, эрсдэлийн түвшин буурсан тухай мэдээллийг хамтарсан багийн хуралд танилцуулж, хувийн хэргийг хаах эсэх талаар хамтарсан шийдвэр гаргуулах ба шийдвэрийг хамтарсан багийн ахлагч гарын үсэг зурж, баталгаажуулна. .

11.3. Хаагдсан хувийн хэрэг бусад материалын эх хувийг хамтарсан багийн нарийн бичиг дарга архивлаж хадгална.

11.4. Хаагдсан хувийн хэргийн мэдээллийг тухайн орон нутгийн гэр бүл, хүүхэд, залуучуудын асуудал хариуцсан байгууллагын Хүүхэд хамгааллын үйлчилгээний мэдээллийн санд Хамтарсан багийн нарийн бичгийн дарга оруулж, бүртгүүлнэ.

#### **Арван хоёр. Хүүхэд асрах хувилбарт үйлчилгээнд холбон зуучлах**

12.1. Гэр бүлийн хүчирхийллийн улмаас эрсдэлт нөхцөлд байгаа, гэмт хэрэг, зөрчлийн хохирогч, гэрч болсон хүүхэд нь аюулгүйн зэргийн үнэлгээ, нөхцөл байдлын үнэлгээгээр эрсдэлийн зэрэг дунд, өндөр гэж үнэлэгдэн, гэр бүлээсээ тусгаарлагдах шаардлагатай талаар Хамтарсан багийн шийдвэр гарсан тохиолдолд хүүхдийн аюулгүй байдлыг хангах зорилгоор хүүхэд асрах хувилбарт үйлчилгээнд холбон зуучилна.

12.2. Хүүхэд асрах хувилбарт үйлчилгээ нь дараах төрөлтэй байна. Үүнд:

12.2.1. Төрөл садны асрамж;

12.2.2. Асралт гэр бүлийн үйлчилгээ;

12.2.3. Түр хамгаалах байр;

12.2.4. Нэг цэгийн үйлчилгээний төв;

12.2.5. Хүүхдийн халамж, асрамжийн үйлчилгээ;

12.2.6. Үрчлэлт

12.3. Гэр бүлийн хүчирхийлэлд өртсөн болон өртөж болзошгүй хүүхдийг аюулын зэргийн үнэлгээ, нөхцөл байдлын үнэлгээний эрсдэлийн түвшингээс хамаарч дараах хувилбарт үйлчилгээнд хамруулна. Үүнд:

12.3.1. Аюулын зэргийн үнэлгээгээр “бага эрсдэлтэй” гэж үнэлэгдсэн бол, нийгмийн ажилтан дангаар болон Хамтарсан багийн гишүүдийн оролцоотойгоор хүүхэд болон эцэг эхэд сэтгэлзүйн, хуулийн, хүмүүжлийн зэрэг аргын талаар зөвлөгөө өгч хүүхдийг тэдний асрамжид үлдээж болно.

12.3.2. Хамтарсан багийн шийдвэрийг үндэслэн сум, дүүргийн Засаг даргын захирамжаар хүүхдийг төрөл, садны асрамж эсхүл асралт гэр бүлд гэрээний үндсэн дээр хүлээлгэн өгч түр асруулж болно.

12.3.3. энэ журмын 10.1-т дурдсан үнэлгээгээр “дунд”, “өндөр” эрсдэлтэй, болон энэ журмын 5.6-д дурдсан нөхцөл байдал үүссэн бол эцэг эх, асран хамгаалагч, харгалзан дэмжигчийн саналыг харгалзахгүйгээр хүүхдийг түр хамгаалах байранд холбон зуучилна. Энэ үйлчилгээ нь хүүхдийг хүлээн авснаас эхлэн нэг долоо хоногоос гурван сар хүртэлх хугацаанд гэрээс нь тусгаарлан байрлуулж, хүүхэд, түүний гэр бүлд харьяалах хамтарсан багтай хамтран нийгэм-сэтгэл зүйн үйлчилгээ, хөгжлийн дэмжлэг үзүүлнэ.

12.3.4. гэр бүлийн хүчирхийлэлд өртсөн болон өртөж болзошгүй хүүхдийг эмнэлэг, цагдаа, төрийн, төрийн бус байгууллагад түр байрлуулан, эмнэлгийн тусламж болон Гэр бүлийн хүчирхийлэлтэй тэмцэх тухай хуульд заасан бусад үйлчилгээг нэг дор үзүүлэх нэг цэгийн үйлчилгээнд холбон зуучилна.

12.3.5. Түр хамгаалах байр, төрөл садан ба асралт гэр бүлийн асрамжид байх хугацаа дууссан, гэр бүлийн нөхцөл байдлын болон үйлчилгээний үнэлгээгээр ахиц гараагүй, гэр бүлд нь эргэн нэгтгэх боломжгүй талаар Хамтарсан багаас гаргасан шийдвэрийг үндэслэн сум, дүүргийн Засаг дарга захирамж гаргаж, хүүхдийг халамж, асрамжийн үйлчилгээнд шилжүүлэх эсхүл үрчлүүлж болно.

12.4. Энэ журмын 10.3.5-т дурдсан үйлчилгээг хамгийн эцсийн арга хэмжээ болгож хэрэглэнэ.

12.5. Хамтарсан баг нь хүүхэд асрах хувилбарт үйлчилгээнд хүүхдийг холбон зуучилж, тухайн байгууллагатай хамтран хүүхэд, түүний гэр бүлийг дэмжих үйлчилгээг үргэлжлүүлнэ.

12.6. Хүүхэд асрах хувилбарт үйлчилгээ эрхэлж байгаа байгууллага, иргэн нь хүүхдийг байрлаж байх хугацаанд хүүхдийн болон гэр бүлд үйлчилгээний үнэлгээг тухай бүр хийж, шинээр цуглуулсан мэдээлэл, үүссэн бэрхшээл, ололт амжилт, үзүүлсэн үйлчилгээний талаарх мэдээллээ хамтарсан багт хүргүүлж, хамтран ажиллана.

12.7. Хүүхдийг гэр бүлд нь эргэн нэгтгэх, хувийн хэргийг хаах эсэх шийдвэрийг Хүүхэд асрах хувилбарт үйлчилгээ эрхэлж байгаа байгууллага, иргэн, тухайн харьяалах хамтарсан баг хамтран гаргана.

### **Арван гурав. Журмын хэрэгжилтийн хяналт, тайлагналт**

13.1. Энэхүү журмын хэрэгжилтэнд Гэр бүл, хүүхдийн эсрэг гэмт хэргээс урьдчилан сэргийлэх дэд зөвлөл аймаг, дүүргийн гэр бүл, хүүхэд, залуучуудын хөгжлийн асуудал хариуцсан төрийн захиргааны байгууллага хяналт тавина.

13.2. Хамтарсан баг хүүхэд хамгааллын үйлчилгээний тайлан мэдээг сар бүр харьяа аймаг, дүүргийн гэр бүл, хүүхэд, залуучуудын асуудал эрхэлсэн төрийн захиргааны байгууллагад тайлагнана.

13.3. Аймаг, дүүргийн гэр бүл, хүүхэд, залуучуудын асуудал хариуцсан төрийн захиргааны байгууллага хүүхэд хамгааллын үйлчилгээний тайлан мэдээг сар, улирал, жилээр нэгтгэж, гэр бүл, хүүхэд, залуучуудын асуудал эрхэлсэн төрийн захиргааны байгууллагад тайлагнана.

12.4. Гэр бүл, хүүхэд, залуучуудын асуудал эрхэлсэн төрийн захиргааны байгууллага хүүхэд хамгааллын үйлчилгээний тайлан мэдээг нэгтгэж, гэр бүлийн хүчирхийллийн мэдээллийн санд оруулна.

-----oO-----